



徐杭遊草序

南州李明睿撰

六經皆序事之文也易以道陰陽書以道治亂禮樂以道中和其所序者卽陰陽治亂中和之事也至於春秋以道名分不言善惡據事直書而褒貶自見尤爲聖人序事之至文焉豈獨詩以道性情爲當序事哉說者曰詩本人情該物理風雅頌興比賦六義俱存豈獨序事乎余曰不然詩三百篇皆忠臣孝子怨女征夫流連繼續感懷而作其間無非直寫意中之事而情與景皆在其中豈如後人之爲詩者置自己之性情而拾他人之糟粕生吞活剝捉摸求詩之謂耶故謂之曰序事非誣也六經而後善言文者莫如司馬子長善言詩者莫如



杜子美今觀其文與詩有一非序事者乎八書十二年表七十諸紀傳篇篇序事至鄜州同谷遊東西川客梓州次雲安移夔州入湖南以及寓居耒陽而卒其集六十卷首首序事但人不及詳察耳自嚴羽高棟論詩以爲風雅不用議論不必序事不知三代以來凡詩之妙者有一非議論序事者乎今之作古文者正坐此病間有議論而不能序事故文遜前賢若詩則尤不能序事以致勦襲堆砌無一字可觀反號於人曰我能詩我能詩嗚呼陋莫甚矣夫其所以不能序事之故則以胸中原無定見特因一時登臨贈答不得已而有詩耳不知詩在人性情骨髓裏不在皮膚口舌之間故惟忠孝人能作忠孝語也今試取陶謝王孟錢劉元白郊島諸人

之詩一一細心讀之議論中有非序事者乎特人以風雅二字蔽錮沉溺使自已性靈不能發見陷入尋常窠臼中遂至老死不得出頭耳今何幸得方子爾止一洗此陋乎爾止自弱冠卽以詩名世將三十年其平生所作不下五六千首今刪去其半猶存二十四卷曰龔山集亦可謂富於詩者矣世人讀爾止詩或稱其氣格雄渾或稱其音節和暢或稱其用意曲折種種不一而吾以一言蔽之曰妙於序事而已往從吾家叔則處見爾止北遊草卽驚喜曰今日詩人中安得有此人乎恨吾老不及見耳踰年爾止來邗溝訪余於舟次余喜欲狂而爾止卽出其徐杭遊草屬余序余觀其遊徐詩不必有戲馬放鶴等字而知其爲徐州作也其遊杭詩不必

有六橋三竺等字而知其爲杭州作也徐杭間山水友朋並皆佳勝其登臨詩必序其山川之興廢贈答詩必序其交情之新故一字不肯虛設蓋天下之景多同而情各異情或同而事各異爾止妙於序事故其詩千態萬狀無一字相同良有以也余往見人送詩輒閉目不觀曰此中原無物何必拾人殘唾獨見爾止詩不覺神魂夢想如在蓬閩間然後知真詩自在人間我自無緣恨相見之晚耳爾止爾止幸善自愛文之神妙莫先於詩一戰作氣再而衰三而竭余之文正當衰竭之時而以序爾止方張作氣之詩能無汗顏然生平愛此等詩慕此等人恨不得見今旣見其詩矣見其人矣安能默默已於言耶况爾止把筆爲我訂詩不特推敲中波數字而已今而後吾願以風雅一席專奉爾止他人不得而攘臂焉故拈出序事一說以爲詩家之標準至其命山命集之意則有叔則兩序及諸公序在且非論詩之要故不書

要姑不書

山命某之意限下姑以兩氣又精公氣非且非備精之
而樂習焉姑出執事一猶以爲若宋之爵事至其命
字而口今而外吾願以風報一執事奉爾士人不得

徐杭遊草序

錢塘吳百朋撰

予讀爾止先生遊草而歎爲有道之士也今遊道窮矣
貪吏攫金肥家不念綈袍故人而客子發怨憤之言廉
吏潔已遠害不能翫法以徇私交而客子亦發怨憤之
言爾止工於詩車轍所到逢迎固多然崩緜落落亦復
不少及觀爾止詩多相成之言無相怨之語雖其友窮
困屈辱樂之而勿去非以窮困屈辱爲樂也窮困屈辱
不足以動爾止之心爲可樂也爾止非有道之士乎哉
今人平居握手相慕悅酒食遊戲相徵逐援青松指白
水以示信一旦臨小利害輒去之且乘其危急加排擠
焉爾止不然方予待罪吳門爾止投一楫諄諄以二監

爲念無他詞也及予對簿石城僦居卑濕湫隘之地爾
止造門急欲一見又諄諄以喪明爲念無他詞也人之
無良問貪廉槩肆罵詈聞爾止之風亦可以少媿矣
蓋爾止爲人脫畧坦夷蕭疎恬退世不能用其材爾止
亦不屈以求合無所抒其意則往往從酒人俠客旗亭
蕭寺以及名山大川春樹暮雲酣嬉流連而不厭故遊
屐所至無論達官貴人高僧貧士賦詩贈答咸得其歡
心卽後生小子寸長足採亦欣然獎進不倦爾止非有
道之士乎哉予嬰沉疾纔作吏卽中蜚語平生故舊無
一引手者且加謗焉獨爾止相見歡好如昔謂人生壽
命幾何富貴利達皆朝露耳且飲酒且作詩因勸予梓
其近什而予亦序其徐杭遊草云

徐杭遊草題詞

吾友龔山氏自少言詩立意便能堅定獨以大雅爲宗
以自然爲妙一切纖巧華靡破裂字句從不泚其筆端
垂三十年守其學不變而日造堅老純熟衝口而道如
父老話桑麻不離平實却自精微他人視之乃在千仞
岡頭可望而不可卽蓋學與年俱進詩益以至焉非一
日之故也竊歎爲詩者初鬪新奇或爭險譎硬語盤空
愛句靡割及其幡然改轍求風人平易之旨而從前工
力置之無用之地詩雖近人力不敵矣龔山三十年晦
明風雨山水友朋朝斯夕斯飲食燕樂於斯憂愁患難
於斯如行遠者無岐路之耽玩禪定者絕外緣之紛擾
雖欲不登峯造極胡可得也龔山詩可易言哉余欲論

定龔山詩久矣而奔走南北苦不暇一日示余徐杭遊草遂書其後云

江寧紀映鍾書

爾止詩天真爛熳觸手成妙近代無此詩人觀者但賞其流利圓美不知爾止鏈鍊甚工但不使人見鑪錘之痕耳昔人收得白傅詩豪改竄塗抹有數易稿而成者豈但逢迎老嫗耶余比之天親之註華嚴龍樹之論般若誦之使人樂聞讀之惟憂句盡蓋於此事中悟一乘圓機得無礙智慧視世間雕鏤色象皆辟支果也彼但以流利圓美相賞者慎勿以知詩許之

海寧范 驥書

龔山續集

徐杭遊草

皖桐方 文爾止著

顧有孝茂倫

同學 胡 介彥遠 定

李枝翹條侯

丘象隨季貞

五言古體

和東坡先生除夕三首

同和者安福康小范莆田林青仲晉江黃俞邵江寧

倪開公是為巳亥元日作

餽歲

貧家寡所親鄰里亦相佐殘年室屢空居積無一貨丈人有好懷餽遺不在大隻雞籬下縛雙魚盤中臥真意

曷忍違留之供客坐荒厨開宿醞細麥出新磨可以恣
飲啖諒無醉飽過叩門者誰子吟詩索子和

別歲

去年遊北塞迢遞歸來遲風塵徒自苦悔咎莫可追今
年返南國卜居淮水涯娶婦得稚布宛如賃春時飢寒
願相守不敢慕輕肥仕宦豈不榮遷謫良可悲有酒且
召客爛醉君勿辭請看明鏡裏容鬢爭先衰

守歲

少小雙瞳子閃閃如金蛇行年未五十倏有薄霧遮精
力未應老其如憂患何今夜燈燭前妻女慎勿譁聽我
審戚歌復作禰衡搗仰視中庭星參昴忽西斜聞雞尚
欲舞壯節恐蹉跎惟有篋中詩異代猶可誇

彭城訪李觀察溉林先生

古人重感恩一飯且不忘何況被明德沾濡十年強使
君昔爲令乃在我鄰疆凜秋扇仁風草木皆春陽顧慙
葵藿質何足當寵光猥蒙君矜賅禮遇非尋常飢則餉
之粟寒則衣以裳凶年免溝壑實荷君壺漿六載君考
績徵爲尚書郎相送皖江口惜別情徬徨明歲至都門
一見喜欲狂煖酒濯我塵假館息我裝聞我有家難惻
焉心暗傷聚首未旬日旌旆復南翔彭城我舊遊山水
夙所詳恨未遊覽遍從茲得津梁峩峩放鶴亭鬱鬱黃
茅岡摧殘燕子樓寂寞逍遙堂願得陪公譙附名於篇
章勿謂隨陽鳥年年爲稻粱

贈徐州守王吉士

昔者蘇長公會爲此邦牧膏雨潤畝畝惠風吹草木是
時澶淵決河水蕩平陸懷襄實可憂公親操版築城郭
賴以全生民食其福又有張山人卜居南山麓公樂隱
者風時時造茆屋至今放鶴亭高文尚華煜公去五百
年乾坤幾翻覆豈無循良吏誰能繼芳躅賢哉王刺史
物望冠羣族昨歲來縮符善政不一足河伯爲安流兆
民咸悅服我適遊彭城冒昧未敢賣君出吾兄門師友
義最篤不忘知已恩推愛及骨肉飲我逍遙堂夜雨聽
絲竹重吟二蘇詩古道宛在目

從楊士佳索四賢詩

每上雲龍山先謁四賢祠四賢者爲誰唐則韓退之曾
叅武寧幕表爲州節推宋則蘇子瞻出守熙寧時是時

黃河決衝突城幾危賴公捍禦力至今黃樓垂其友陳
后山抱道隱茆茨公薦爲教授儼然儒者師又有楊龜
山理學宗濂伊始仕郡法曹小官亦不卑四賢本殊產
俱宦遊于茲徐人高其風崇祀永不衰楊生千載後懷
古典遐思旣輯四賢文又輯四賢詩合梓成一編可用
爲羽儀我昔遊彭門頗搜山川奇見此欣欲得君適去
江湄今年訪君廬握手如故知連朝飲我酒杯筆何淋
漓借問四賢詩云胡不見貽

爲鐵佛寺僧題募疏

有客來彭城苦無棲泊處旅舍豈不多喧卑難以住城
南開元寺鐵佛名最著其地甚弘敞其僧皆淡素况近
雲龍山可以恣閒步但恨禪室少客來僧卽拒東偏餘

五楹廓落似荒署若以屏間之窄小轉多趣僧云食尚
乏那得修飾具所願諸檀越各捐少許助左右分兩間
相對爲門戶更設几與榻事事得所措向後嘉賓來皆
可送此寓幸勿吝涓滴合之成雨露

武林呈范僉憲正

范公昔爲郎奉使來舊京秉性好風雅又復好友聲所
以衣冠士望之如蓬瀛我友顧與張與治衰年困柴荆
方春逢雨露草木含滋榮石湖有邢叟孟貞六義研頗精
其詩數百篇散落同野苹公爲表章之遂成千載名是
時我南來聞此肝膽傾懷刺一往謁辱公倒屣迎且謂
予宜序所愧人言輕明日卽北轅遙遙抗前旌枉駕過
羈旅厚貺無吝情古道今寂寥此義何崢嶸厥後二三

年分司越王城峻比南峰高潔比西湖清外臺寧久淹
立召爲孤卿我適遊越州涉江采芳蘅與公咫尺間安
忍恻然行停舟叩幕府乞酒澆塵纓

題鬱林石

友人吳錦雯理吳郡迎其尊公靜庵先
生來署中一日于墻陰得片石異之諦
觀其上有鬱林石三字疑卽三國時陸績所載
也靜庵舊爲粵令以廉著愛玩此石有同心焉
此作

東吳有前賢姓陸字公紀嘗爲鬱林守廉介著青史歸
時患舟輕載石充行李及其抵吳郡石棄於淺水吳人
重風節樹石表公里猶恐他石溷鐫刻使不毀迄今千
餘年此石竟湮矣我友武林生除授吳司理迎親至官
舍羣花爛如綺散步行花間低頭摘芳蕋偶然得片石
隱隱峯巒起其上有三字雖晦猶可指當年陸公舟所

載恐卽此誰移郡齋中想亦大君子若翁曾令粵秉躬
嚼不滓郎君筮仕初亦以廉自矢此石久淪落遇合非
偶爾吳陸古並稱賦詩張厥美

留別諸駿男文學

臨安風俗儉好客者殊少卽有同心人禮數仍草草正
如杜陵詩一飯跡便掃諸君本貧士滿腹富文藻曾遊
江淮間果得名譽早前日聞我來盤餐遽傾倒今朝聞
我去又復集朋好此意獨慙慙欲別傷懷抱秋颺何謾
謾秋月何杲杲把酒送歸人相思白門道

蔡子虛員外月下招飲賦此謝之

孟冬天氣晴霜葉下羣樹貧家罕人事炙背當軒戶忽
聞叩門聲云自蔡水部貽我詩一卷其名曰郎署辟如

秋水澄不受纖塵汚更妙是篇首耻借達人序自題三
五行樸直見真趣詩後有尺書要我今夕聚皓月懸中
天流光勿虛度薄暮杖藜往壺榼已先具所約皆名彥
討論惟詞賦不似宦遊人酬酢拘禮數臨別謂今夕安
可無佳句歸來興勃然聊以學君步

荅沈方鄴見訪

憶與若翁交乃在廿年前曾遊敬亭山館舍欣相連一
日一過從情分何纏綿是時爾總角風骨秀且妍喜與
豚犬子同生癸酉年我笑謂若翁兩世俱豪賢匪獨結
弟昆還結爲姻緣亡何逢世難陵谷倏已遷烈士誓捐
軀不肯命苟延至今宛溪上麻沈名並傳聞爾年旣長
文采果翩翩吾兒亦能文蚤歲歸黃泉念此肝腸摧不

來守此緬懷古跡不勝情中間最愛二蘇子二蘇題咏
滿黃樓安忍廢置如荒丘行歷城東得舊址慨然捐俸
爲之修未及一年樓突兀恍疑金闕臨溟渤河中百神
俱效順河上千艘任超忽層城刻木像二蘇四時禋祀
羣黎趨豈直遊人恣玩賞實爲守令存師模是時我來
自淮甸與君登樓日懽讌徐人知我是君客磨石鐫文
待予撰我觀世間陵谷多遷移惟有文章政事永不衰
斯民直道尚二代頌公明德非吾欺預知異代登樓者
蘇魏齊名萬古垂

寒食日吳臨垣明府招同來伯中黃諸子登放鶴
亭

去年寒食客榆關苦憶江南不得還今年幸已返南國

何爲又客徐淮間徐州自古名勝地山城卽有雲龍山
山頭放鶴亭尚在昔人題咏苦蘇址吳君竹林雅好事
提壺邀我同躋攀是日恰逢禁火節紛紛上塚人不問
忽憶故鄉千里外墓門荆棘誰爲刪祗緣里巷有豺虎
遊子欲歸險且艱風塵南北豈得已臨水自照傷心顏
贈吳來伯別駕

彭城主人好客多美醞獨數吳寧波寧波釀法既有異
封藏又復三年過尋常讌集甕不開開時必待嘉賓來
我非嘉賓忝上座眼看琥珀盈金杯初一沾唇香味足
三杯四杯春滿腹十杯已醉勿復斟扶杖出門身不孑
主人謂客酒何如有暇時復來吾廬紅鱗紫蟹諒不乏
况乃架上多奇書書任我觀酒任酌作客無如此間樂

但恐此客來太繁主人瓶空亦杜門

贈李孝乾孝廉

李先生年六十餘鄉舉乃在 熹廟初七上公車未釋
褐歸來閉門惟讀書昔猶不仕况今代所以白首甘樵
漁我到彭城訪耆舊先生家在雲龍後乍睹風儀白淳
古重覽詩篇更蒼秀詰朝相約過君廬啖我香蔬飲我
耐我聞漢之龔勝此州人寧死不肯臣莽新先生與龔
同志操又能用晦全其身異時登眺雲龍者爭指山阿
問逸民

飲萬瞿客樊桐堂感舊作歌

前年上君堂曾賦二客行今年上君堂二客分死生死
者返其宅生者難爲情感此不能飲不飲空吞聲強起

移尊花下酌垂絲海棠半開落花落那能再上枝人老
應無再少時君今妙齡宜努力莫將塵務嬰胸期世人
泪沒塵中死若兄雖賢未免此何以洗塵多讀書能似
若翁卽才子 瞿客乃年少之子遐客之弟也

七夕飲李笠鴻齋頭

憶昔芝田劉伯子與客西湖弄秋水遙望東南五色雲
狂呼大叫烟波裏明年淮甸遇真人運籌帷幄如有神
儒生裂土自君始至今子孫處海濱蹇予亦客西湖畔
遙聞鞞鼓喧江岸畫船不許放中流藕花蒲葉空零亂
野酌偏逢乞巧時坐當星漢露華滋主人醜酒更相勸
朗詠犁眉數首詩

中秋日雨留別宗人秉虔

六月我來湖上遊屈指歸期在新秋豈知京口纏殺氣
江程阻絕空懷憂假寓招提近城北滿城兵馬紛如織
一月不出錢塘門獨坐僧房暗悽惻忽聞爾自黃山來
移寓就我何快哉朝朝暮暮共尊酒佛前燈火雙徘徊
因循遂至中秋節道路漸通吾欲別蕭蕭風雨惜離羣
別後相思看明月

捉船行

吳閫一路兵捉船榜人奔竄蘆葦邊三日五日不敢出
夜夜驚呼那得眠歸客蹉跎情自苦况復秋風亂秋雨
荒洲無處覓飲食紫芋紅薑噉少許來朝風止雨亦晴
大舟畏怯應難行急買小舸似鳧鴈間道溧陽趨石城
石城用兵已兩月道途梗塞音書闕此行但保平安歸

以後遊踪勿輕發

喜陳伯璣移居相近贈此

我客江淮廿餘年年年稅人居可憐今年始買白下宅
桃葉渡口青谿偏其廬雖敝巷雖陋水光山色當門前
我友陳君數過此深羨此地多林泉亦欲卜居鄰左右
恰有鄭老餘一廛不惜兼金至十鑑今朝買得明朝遷
牆外澄泓一陂水樓上宵靄千家烟望衡對宇半高士
與我草舍尤相連有暇卽過過卽飲不論雪月風花天
勸君且勿歸章江我亦不用歸桐川丈夫飄蕩逢世亂
苟全性命遂終焉何必定種漢陰圃何必定耕南陽田
閉戶著書各努力千秋萬歲名爭傳

題載花船短歌

為張萬青作

自古美人多不壽壽則紅顏漸衰醜不如年少化芳塵
蛾眉千載尚如新我友張君本仙吏買得如花人並蒂
秦川粵嶠遠相從蘭舟共載雙芙蓉那知樂事天所妬
霜風一夜凋瓊樹人生有情誰能堪譜入新詞遍江南
時時招客來羈旅一聽哀音淚如雨子平子肅各必傳
不信但看載花船

五言今體

從兄繡山新居

城南又卜宅不離鳳凰臺自有山林趣何煩車馬來松
筠多舊植梅菊况新栽春水盈池沼軒牕面面開
悔作都門客風塵潤一年息肩來白下儼舍亦淮邊所
願衡茆接長教枕被連秋成催釀酒相見卽陶然

淮上遇潛江如有贈

舊遊如昨日彈指十三年只有蒹葭思渾無蔓草緣那
知仲春月相遇大河邊喜極翻多感臨風一喟然
曾聞江上信叅幕去南州性拙難干祿家貧易白頭一
椽兵又占八口餒堪憂所幸兒婚畢徐圖五岳游
不記金閨日烽烟白晝昏高樓逢越女小艇遁湖村惠

難惟君共交游獨我存抱篤人已矣凄絕更傷魂
我欲彭城去心隨陽鳥飛故人忽相見行李詎能違借
榻淹春夜停觴送夕暉淮南多好友且住勿言歸

補壽范眉生三十

步天醉韻

長淮風雅地小范最知名九月逢初度扁舟往潤城江
山供睇笑賓從喜將迎何物觴君好吟詩和趙生
同輩多衰白惟君正妙年讀書千卷破警句萬人傳復
有養生術能如樂志篇虛名羞李郭終遜范滂賢
欲師先少伯烟艇四時宜底事鶯花日都爲粉黛羈高
秋來故國狹巷擁新姬處處沾香澤何須嘆遠離
服藥非關病憂時感萬端逢場休戒酒捫腹且加餐獨
世求榮易閒居免禍難祇應梅與竹不畏朔風寒

交態今時薄誰能久弗諼一人敦古處四海想成言偏
愛龔山客相留幽草軒雖然闐闐裏渾不異郊原
淮水通南北三年三度過停舟尋我友下榻宛烟蘿枕
上吟聲熟樽前樂事多征途非不急爲爾故蹉跎

丘季貞社集西軒分韻

同集者潘江如張伯玉靳
茶坡張虞山程斐東趙天

醉范眉生
倪天章

故人離索久淮上忽相逢不忍倉皇別且淹來去蹤高
齋良燕會羣彥悉過從莫問河南北烟波路幾重
數年前有願釣浦結茆菴得與同心友長爲竟夜談機
緣終不偶離別意何堪稍喜經過此停舟一再探

題倪天章一草亭

茆齋手自闢幽曠若秋山淮甸且爲客清源何必還

倪

清人良朋來海內名酒出花間知爾輕華屋貧居好是閒
彭城喜李條侯至

都門風雪夜古刹忽逢君片語成膠漆孤蹤各水雲黃
樓期再晤碧澗許相聞明旦果驅策來尋猿鹿羣
城南鐵佛寺荒僻似山中僧舍我先寓羈棲爾亦同晝
行雙馬出夜話一燈終此會非容易他年思不窮
英公山下路烟樹是君家前此未停權後來當看花吳
兒解絲管楚水足魚蝦到日拚沉醉囊空莫漫嗟

陳善長五十初度

陳生天下士五十尚青袍世亂休言祿身閒雅自豪箕
裘承祖德鉛槧教兒曹却笑朱翁子干時何太勞
淹博徐人少惟君腹笥便燭知師曠秉榻似管寧穿好

客多藏酒謀生且種田不須求大藥高枕是延年

曉渡燕子磯

殘月四更出城中人未知可憐江上客正是渡江時風
小波初靜天空露亦滋娟娟一片影幾日令人思

送汪我生內兄北征

高義輕榮祿閒居十五年俄驚公府檄又上孝廉船道
在何妨仕時危且任天此心長炯炯不必蹈前賢
昨歲遊燕薊風光異昔時羣公多戚戚外吏轉怡怡但
得鄉間近休嫌官職卑先人在慈水芳澤至今垂

石城曉發

淮南歸未久又作淝西遊客路雖嫌暑悲心不待秋關
身同野鶴小艇逐江鷗况值風帆駛須臾到潤州

金山續集
晚泊京口不得上岸問談長益潘江如消息
談叟遊燕塞三年尚未歸潘生逢楚澤數日又相違妻
子山中餓音書江上稀停舟不及問翹首悵依依

丹陽道中

離家纔幾日兩度夢柴荆自是老人態非關兒女情卜
居今有宅賣藥可爲生便作終焉計來年罷遠行

立秋日范僉憲招集西湖

江上羽書急羣公相對愁使君何整暇召客飲新秋越
國山川秀吳兒絲管悠曲終懽未已暮角起城樓

立秋前一日與龔孝緒泛舟湖上

秋水一孤艇夏雲千萬山涼生榲樹底香動藕花間江
雨忽然至岑城未可還君家分半榻重與醉柴關

靈隱寺喜遇願雲禪兄

是日卽其五十一初度

雲居山頂宿彈指七年餘鄙渚難重權門人數寄書雪
鴻飛不定靈鷲忽相於懽劇那能別香林且飯蔬
問年剛半百嶽降是茲辰夙慧開天眼名儒轉法輪漫
勞分孔墨持此報君親只恐秋陽曝終非補衲人

飛來峯

島嶼若憑空雲根到處通何年來海上獨戀此山中黑
白二猿在陰晴萬樹同所嗟塵世客遊覽太匆匆

吟泉亭

天竺下山路皆從靈隱過此亭臨澗壑之子任婆娑松
檜夏偏密樵蘇晚更多當年白少傅高咏意如何

香山泉亭詩

六月廿六日內人初度予不及歸寄此

今日是何日細君懸悅辰無端來海嶠不及返江濱孤
權偏留客雙魚也笑人早知爲客苦何似在家貧
外家親不少此日定相過只恐驚烽火無心訪薜蘿同
居有娣姒小酌且婆娑歸路元非遠其如阻絕何
忽報南都外沿江列戰船移家才帖息逢亂又顛連汝
是閨中子猶知醉後天他家願富貴妾願老林泉
青溪桃葉渡新買一精廬合與汝偕隱雅堪吾著書池
塘收衆水園圃植嘉蔬便作於陵子長貧亦晏如

贈張卿子先生

誰謂張公老修髯白未勻著書垂異代采藥救民道體
忙愈健詩篇瘦有神春秋七十六還似少年人

名園藏委巷小閣對芳塘靜聽兒孫讀微聞草木香客
來留一醉運去感繁霜况復明朝別悠悠江水長

贈劉望之

劉生絕嗜慾又復斷暈腥祗合歸禪悅何緣屏佛經風
騷多解注湖海任飄零古道今如土斯人見典型
聞君棲破寺僮僕亦蕭然密邇惟諸陸淹留已數年我
來秋雨夜得與對牀眠茗粥差堪飽何勞費酒錢

太湖避兵

將近楓橋路惟聞人語喧北來兵肆掠東去艇皆奔震
澤烟波迴高秋風雨繁此時期免患艱苦復何論
痛此一區水吳盧曾用兵風期豈不烈氣數莫能爭霜
樹先朝事雲峯異代名可憐懷舊者夢裏見平生

喜胡逸菴見訪感舊

逸菴居蕪湖之塔塘其子日觀子門人也

塔影塘邊路當年幾度過傾杯情不淺指廩貺尤多秋
樹飄黃葉春江冷白波九年才一晤欣慨意如何
風雅蕪陰盛君才亦斐然故人千里夢今夜一牀眠語
不離詩外愁應破酒前阿戎吾所畏家法自能傳

牛首雜咏

不上牛頭寺蹉跎十九年本來無住着何事亦拘牽客
久少閒日冬晴趣好天相將出南郭驢背意欣然
行行剛數里恰遇在山僧迴駕為吾導攀蘿知爾能風
光剩南畝松栢宛西陵不似丹陽路牛車層復層
策蹇到山麓西峯正夕陽路緣危磴上寺比昔年荒倦
且憇僧閣明當禮覺皇厨人供脫粟蔬荀味偏香

吾兄輕仕宦五十便懸車出世意雖切遊山與轉疎今

宵臥雲壑將晚聽鐘魚始悟昆尼理塵襟頓掃除

是日與繡

山從兄同宿僧舍

林端日初出徐步躡山椒疊嶂名天闕與雲拱聖朝蔣
山猶在眼紫氣未全消愁殺朔風急松根葉亂飄

文殊古洞後石壁最嶙峋開士新藏骨愚夫妄捨身入

山曾有約問法已無因半偈題遺像依稀見此人

鐵漢師屢

招予上牛首不果今亡矣塋舍身崖

散步出門外雲梯百八重緇衣引幽徑黃葉沒行蹤水

澗桃花澗懸臨獅子峯古藤更奇絕纏殺數株松

寺西有桃

花澗其下為獅子峯

空林聞犬吠二客啟柴門指畫山川勢摩娑松檜根

胡星卿精形家言 暗牕窺塔影枯井汲泉源茗粥非容易將何

報佛恩

宗風傳懶祖地以祖堂名相去路非遠焉能罷此行况

聞耆舊在益起具瞻情明夜高峯宿焚香心更清牛首開山

者懶融師也住祖堂山今楚僧石溪寓此

石公跌坐處萬念總銷磨几上烟雲起胸中丘壑多

應長侍此無奈欲歸何山路往來熟非時取次過

雪後杜蒼畧吳素夫父子見過限韻

卜居雖不廣小閣俯秦淮幾夜雪平岸初晴泥滿街何

人肯相訪之子况能偕無事且深坐高吟愜我懷

貧家無旨蓄何以禦殘冬幸有杯中物遙看江上峯關

情惟故舊乘興每過從莫慮歸途暝城隅寺未鐘

七言今體

元旦試筆

北遊已作無家別不意南歸又有家匝地霜風俱落葉

傍巖寒木始生花故鄉未可容漁釣新婦猶堪挽鹿車

但使熊羆來入夢商瞿五十復何嗟

早春三日沈仲連移尊顧與治宅招同陳伯璣會

止山諸子各賦一詩

前年霜雪寓淮陰除夕相過感慨深今又江南逢改歲

特來花下散愁心飄零俱是四方客衰白何堪兩鬢侵

屈指長干春色好松風木末再招尋松風閣名木末亭名

送方干霄兵憲之任粵東

使君乘傳向南溟取道京江檝暫停桃葉渡頭尋隱逸

雨花臺畔得娉婷酒如寒水千重碧眉似春山一縷青
到日明珠還合浦定知懷抱有寧馨時干霄納金陵姬

客歲都門風雪天與君館舍恰相連隨時痛飲雖云樂
獨臥空房亦可憐官轉外臺同執法香添侍女宛神仙

故人不得來分俸白葛丹砂寄估船杜詩交趾丹砂重
韶州白葛輕時因

上巳宿房村懷吳八中黃

二月揚舲過楚州豫知修禊在黃樓那堪中道逢陰雨
空惜佳辰逐水流驢背吟身無依着橋頭村店且歸休
來朝想到吳郎宅定有香醪破客愁

重至彭城訪魏竟甫少府

前年驅策上皇州取道彭城一暫留顧我嚴寒猶短褐

荷君高義贈重裘雲龍山下吟聲壯馴鶴亭中禮數優

及到都門逢令弟三人推分亦綢繆令弟石生總憲辨
若函乙二孝廉

羣從伶仃劇可憐得為書記意翩翩豈知弱質先朝露
未報弘恩已下泉紫塞乍聞心痛絕黃河重渡淚潸然

公庭一謝雲霄誼不似修江乞酒錢從子公敏死于少
尹幕中故云

哭萬二還客

曾為秋玉堂中客攜酒南山送遠人此日交遊俱在眼
惟君奄逝獨傷神黃河慘澹疑無色鴻鴈呼號失所親
衣袖隰西痕未滅又添多少淚痕新萬年少別隰西
還客之叔也

送徐二克任歸吳門

彭城賓客盛如雲文采風流誰似君畫裏烟巒偏秀發
句中蘭蕙亦清芬提壺只合臨春水折柳那堪對夕曛

期我新秋到吳市山塘歌吹日相聞

喜馬三嘉甫至

我入都門君出都風塵相識在須臾長懷舊侶應難見
不意茲遊得與俱石狗湖邊尋古蹟雲龍山下訪潛夫
閒身且莫傷流落回首京華是畏途

荅李司直見贈兼懷于息菴先生

新詩贈我似瑤琴欲報慙無玳瑁簪且喜彭門爲酒伴
忽聞杜宇動歸心風塵奔走何時息烟水蒼茫此處尋
借問高人在巖穴十年懷思到於今

奉別李觀察溉林先生

二十年來江海遊交情誰似使君稠曾於熙水分困粟
又向彭城贈麥舟黃爵有知猶解感玄駒無力那能酬

南歸定買青溪宅懷漑名堂在上頭

將去彭城前一日別韋佩二

黃茆岡下草萋萋我去君來路不迷旅次相逢聊聚集
貧交未忍遽分攜新詩出篋清如綺別酒傾壺醉似泥
明日南歸仍見訪鳳臺東畔雀橋西

闡百詩送予至平河橋兼示剩道人句

前過平河趨順風未曾登岸恨匆匆歸時竹巷先相訪
翌日蘭舟許暫同况有新詩來塞上誰傳異寶到南中
冰池雪窖心猶熱始信彌天一剩公

李研齋太史杜蒼畧山人暑中見過限韻

雞鳴山下美人家我欲從之道路賒短棹忽過桃葉渡
小園先看石榴花一瓢冷飲煩襟滌衆樹濃陰畏日斜

安得青溪同買宅草堂朝夕對茶瓜

周伯衡副憲招同康小范陳伯璣倪闇公諸子小集

石城歸棹自虔州千里江山一瞬收詩思高於天際鶴
宦情閒似水中鷗星輅畏暑停南國梅雨邀賓聚北樓
堦下素馨花爛熳可能分惠一枝不

姑蘇東吳司理錦雯

吳生本是采薇人捧檄之官只為親祿養早知無半載
巖棲何不竟終身倉皇解組師陶令寂寞懷芳類楚臣
獨惜龔山詩句苦臨當劄劄又因循錦雯方為予刻詩以罷官不果

贈徐松之兼悼亡友史弱翁徐掌文

八年前見懷音集間氣英靈總不如懷音集松之所輯也做中興間氣河

嶽英靈選法惟爾貧家好梨棗搜人麗句比瓊琚曾游石臼

舟相左徐曾訪予于高淳不值直到金閶願始舒回首舊交零落

盡西濛亭館亦丘墟西濛地名史徐所居

虎丘遇吳岱觀因借姚仙期徐松之小飲達曙

侵曉來遊海湧峯言歸直到日西春長堤正苦無船附
中道誰知與爾逢且莫移舟違野岸即教沽酒話離悰
聞雞又欲匆匆別回首烟波幾萬重

吳江訪顧茂倫

垂虹橋畔日初斜有客停舟問爾家鄉里皆知是耆舊

詩篇誰不誦英華茂倫方刻唐詩英華行世門臨流水仍環樹月上

空庭且醉茶廿載離思今始慰明朝烟艇又咿啞

武林訪徐月鹿水部

使者乘輅出舊京遊蹤先去北平城蘭舟共載虛前約
菲店相思有嘆聲隔歲才能來水國過期又欲轉王程
湖山深處堪延賞赤日炎風且慢行

訪李笠鴻

秋初歸自莫愁湖又買西陵宅一區僻地重開浣花徑
深閨雙產夜光珠琴書有托何妨老賓從相過合與娛
我亦明年四十九不知能步後塵無

笠鴻長予一歲是年連舉二子

訪胡彥遠

未到西陵先問君幽棲不使世人聞城隅野徑尋三日
樹裏炊烟識五雲倏聽叩門聲自喜忙呼賒酒意何殷
旅堂且坐消炎暑蕭寺言歸待夕曛

彥遠所居名旅堂

西湖廣化寺前樓崇祀近代死難諸公一日與客

停舟登此徘徊久之蓋忠毅左公浮丘先生文
烈汪公長源先生皆予外舅也因題一詩於壁
危樓迴出聖湖西上有羣賢木主齊弘正以前猶隸側
謂于忠肅孫忠烈天崇之末自酸嘶兩公更切維桑誼二女同
為采蕨妻身賤敢言冰與玉岱宗或不愧攀躋

壽吳靜腑先生七十

神廟初年君蹶生當時四海樂昇平豈知白首偏逢亂
猶喜青山未輟耕家有機雲傳舊業才如卓魯著專城
鷹揚若是皤溪叟此際垂竿竹尚輕

飲陸麗京齋頭因與劉望之留宿

賣藥長年在海濱偶因殯妹入城闔布袍不與羣公接
蔬酌偏于舊友親旅寺欲歸愁路暝書堂留宿見情真

中宵風雨聲悽切俱是蕭蕭槭槭人

錢塘慕明府雨中見過

有客懷歸歸未能棲遲荒利似孤僧新秋况值蕭蕭雨
長夜誰依黯黯燈忽報軒車來北郭也知恩澤徧西陵
時危不敢勞分俸乞與京江一葦乘

留別范文白

陸大行家共酒卮與君深夜細論詩滄桑十七年如夢
鬚鬢數千莖已絲東海難尋招飲處西泠相遇解維時
袖中短冊勞題贈別後依稀見所思

中秋後一日飲沈冠東學博齋頭

茲辰準擬去西湖出郭聞兵又稍須况有故人邀賞月
不嫌遊子慎歸途中庭白桂花初放鄰舍黃公酒易沽

愁殺軍城鳴夜柝當筵欲別幾踟躕

贈沈御冷宏度

沈家兄弟雙鳳雛生逢世難羞為儒寧甘黃髮歷齒老
弗肯躍馬乘軒趨同心况復有錢陸少年相約歌農虞
願爾努力事風雅不然無異山澤癯

白下逢朱子葆感舊

青溪烟雨憶昔遊與君醉臥溪上樓神州倏忽變滄海
故人強半歸荒丘謂吳次尾王穆如晨星落落二三子霜水茫
茫十五秋今夜雨牕重對酒蔣山一望淚雙流

李三石自京口至

君去南徐一月回江山流覽興悠哉况逢處士潘錢在
江如又值詩人范趙來眉生天醉采菊定尋甘露寺觀潮重

上妙高臺慙予未及同舟往旅次寒燈獨舉杯

牛首山頂望南村

曾聞白下父老語至寶莫如南鄉田近水土膏最腴澤
傍山村路多芋眠兵戈不見離亂苦丘隴尚剩侯王阡
何年得買三十畝茅茨自結松筠邊

祖堂待月

尋山不及望舒時蟾兔何妨四五遲
佛前一點是琉璃微茫漸見東林白皎潔先從上界窺
此際下方人睡熟霜華月色有誰知

沈子遷五十初度招同張扇笈孫阿漚紀伯紫集
興善庵

初度如何不在家家人介壽覺喧譁霜江盪漿來京國

野寺焚香誦法華况有良朋同嘯咏莫將市酒溷茶灰
餘年若肯師高適從此攻詩力正賒

顧與治齋頭話舊

屈指貧交三十年少時相愛老相憐江邊置產渾無計
門外求書尚有錢腰痛那能還客拜朋來只可對牀眠
新詩珍重休拋却留與千秋人共傳

張古岳侍御見過

張乃先司農之門人也

卜居深巷似山村歲暮無營獨掩門忽有中車來菜圃
正如晴雪落松根青氈不忘先人義白首猶懷知己恩
顧我荒廚終日冷可能推食飯王孫

冬日種花

年來漂泊總無家雖借人居亦種花今有一廛餘隙地

肯教三徑委泥沙開春桃杏當牕秀入夏葵榴滿院遮
幽意獨憐梅與竹霜天雪月更堪誇

李雲田見訪並攜談長益書至

抱甕丘園久息機忽聞楚客叩柴扉袖中詩有烟霞氣
語次風生薜荔衣遠道爲傳吾友信奇蹤真覺世人稀
潤州城破家家哭此老如何竟不歸

五言排律

移居宋家園 三十韻

宋公吾父執闢館號鷗天少小曾遊此園林正蔚然亂
更三四主別至廿餘年門巷雖仍舊風光迥異前偶而
來一問居者又將遷善價歸予手幽棲絕世緣圃畦聊
自種蔬菜不須錢墻破憑籬補牕稀賴竹編杏榴開可
玩榆柳伐堪憐從此加培植奚難再鬱芊仲冬陽始復
幾望月初圓徙自城南廡家於巷北屢孤踪有寄托盡
室得安全夜讀層樓下朝行曲岸邊鐘聲殷古寺草色
媚晴川仰首蔣山近傷心淮水偏比鄰多隱逸隨分與
周旋墨妙家家有詩神處處傳老猶貪酒醜貧不斷炊
烟况賣嚴京卜兼通素難篇細君催釀黍小婢解烹泉

客到嘗留醉吟成每共眠胸中自浩落身外曷憂煎所
願熊羆夢惟期豚犬牽衰顏才足慰書種但能延便入
金陵籍長耕建業田春波桃葉渡秋浦藕花船白首恣
行樂芳塵繼昔賢懷刑知免矣抱道合終焉敢望宋公
子鳴珂侍講筵

宋公如園先生也與先司農癸卯同門
公子其武方爲經筵學士

自蘇杭菜水來途經如愚齋
來一問吳泮又許登善賈誼
更三四主際至廿餘年門寺
宋公宮文梓關前照調天少
蘇君宋宋園三十餘

正言掛軒

七言絕句

金陵感懷十首

崇禎初年予應京兆試南都風景居然全盛也
甲戌乙亥避流寇之亂徙家於此凡十一年故
白下山水游覽頗熟乙酉世變子卽歸桐戍戍
冬重來此城郭人民大抵如舊惟蔣山雀湖等
處非復當年矣撫今追
昔感歎不勝因作此詩

蔣山

鬱鬱葱葱數百年千尋枯栢上參天不知何事凋零盡
惟有春風泣杜鵑

燕雀湖

戎祖填湖作禁城九重宮闕儷咸京黃扉碧瓦今何在
依舊白波青草生

玄武湖

徐杭遊草

徐杭遊草

三

官家築室後湖中三百年來版籍克故紙幾何渾賣盡
鯽魚菱藕一時空

孝陵衛

當年軍衛百千家此日離披似落花猶有兩般人未改
孝陵棉與孝陵紗

南中賣木棉賣機紗者多孝陵衛人

觀象臺

自古占星重此臺璿璣一旦委蒿萊古銅欲賣無人售
拋却城隅見者哀

國子監

太學師儒體統尊往年多士擁橋門如今祭酒爲司訓
官舍不如原上村

大功坊

開國分封異姓王中山獨建大功坊何年改作藩司署
公子流離泣路傍

正學祠

正學先生十族墳祠堂軒豁樹如雲可憐樹伐祠因廢
每夜啼鳥不忍聞

表臣祠

表忠祠與冶山鄰崇祀方黃一輩人多少閒房偏拆此
世情元不愛忠臣

舊院

文德橋邊亭館幽六朝風韻未全收那堪蕩析爲平地
白草黃花無限愁

雪後渡黃河

作客偏逢雨雪天，衝寒又上大河船。聞人此日遙相憶，只道紅樓擁妓眠。

寒食

河北從來節候遲，春歸才是看花時。今年况復閏三月，寒食全無花一枝。

李孝乾家賞白牡丹

客中桃李亦堪觀，况是芳亭白牡丹。兩日頻來君莫厭，只愁風雨易摧殘。

送張楚材之碭山

芒碭山中草樹春，聞君欲去又因循。當年五色雲何在，只恐今無隱道人。

驢背馳驅正夕陽，路人猶指斬蛇岡。岡頭買酒憑君醉，

劉四朱三總斷腸。

漢高帝行四朱
溫行三皆徐人

贈徐生

生妙于音律

霓裳仙樂自誰傳，老去猶能被管絃。莫話開元天寶事，令人腸斷李龜年。

短笛橫吹最有情，况於溪上月華明。祇宜楊柳梅花曲，莫作摩訶兜勒聲。

湖上觀劇

誰譜新詞忌諱無，優伶傳播到西湖。驚心最是張方伯，不敢重看鐵冠圖。

與晦公坐三生石

侵曉尋山露氣新，三生石上話前因。不須身後才相見，猶是歸宗寺裏人。

公與十曾住
廬山歸宗寺

別龔二孝緒

秋來兵卒阻重城孤負湖山一月晴今日樓頭聊騁望
西風又欲送人行

題問旭上人畫

千尋絕壁俯溪流有客揚舲自泳游日暮碧雲天際合
無邊詩思屬湯休

寄蔡四芹溪

十年不見蔡芹溪溪上浮萍東復西今日逢君鄉里客
一行書信數行啼
裁書何事淚潸然我老君尤長幾年身賤家貧聊自遣
不應詩禮尚無傳

魯游草序

福州八二叟林古度撰

萬曆丙辰予與鍾伯敬吳康虞同登泰山各有詩鐫石
今四十五年矣庚子秋吾友方爾止從泰山歸言從荒
荆蔓草中重爲摹榻持以贈予予展視欷歔恍如隔世
旣爲詩以酬之而爾止又出其燕游魯游二草屬予序
序曰今天下不可游矣若爾止之游似又未嘗不可也
蓋天下人之游游於利名場中仰面屈膝于人而人莫
應此非人塞其游先自覺其游之不廣故多怨悵而無
所適從焉爾止挾三尺劍一囊書北游燕趙東游齊魯
弔古於金臺盧龍望先朝之宮闕潺湲出涕已又登岱
宗謁孔林恭敬肅將因而長吟短詠發摠其胸臆卽有

一二地主款曲流連酣歌豪飲論騷說雅皆是其生平
舊交攀留不舍者非懷刺彈鋏妄爲干謁以取厭棄者
比也故其北都東郡之詩浩浩落落寄托蕭遠不怨不
怒使人讀之如少陵奉先北征諸作當年情事歷歷如
在目前然則爾止之游直如未嘗游者矣且爾止雄心
壯氣年五十而不衰正如高適之學詩商瞿之生子卜
居雨花桃葉間予雖老耄猶得奉周旋於晨夕側觀其
著書教子俾承家學永遠勿替是集也豈非爾止之墨
莊也耶

魯游草序

夔州李長祥撰

李供奉蜀人也蜀山水之奇供奉詩不及焉杜工部在
蜀亦惟瞿唐劔閣有詩耳以峨眉之奇而工部不及焉
供奉則有峨眉詩然僅一絕句其游山東也有泰山詩
五首而孔廟不及焉工部則俱不及其在任城止望嶽
一首耳古之人於詩其思力之所至則爲之其不爲者
想亦其思力有所未至也爾止先生游山東盡覽泰山
孔廟之勝無不有詩予訪之哺雛軒出以示予予懷歸
得讀竟日大約爽爽朗朗不煩鈎索自然工妙然則其
思與力殆有過於古之人者耶楚人杜于皇與予言詩
最洽因並讀爾止詩各爲之序蓋天下之知爾止者以

金山續集
詩知爾止之詩者不止於此而讀此詩者亦可以知爾止矣

魯游草序

黃岡杜濬撰

三十年以前余至金陵交游多老蒼相與唱和宴游馳騁上下其議論者有龍眠數子而余與爾止尤傲睨其間是時畧未聞道徒以年少負才逞奇好辯必屈伏人而後已諸老蒼顧益重之以爲此人旦晚公卿耳無何變亂接踵十數年來諸老蒼消磨殆盡而余與爾止公卿夢絕亦居然老蒼焉蓋前後之脉中斷識吾兩人者已鮮吾遂頽然順之加以飢寒憂患骨肉之痛百念灰冷噤不敢發聲而爾止獨不然剛正之氣百折不回往往譙讓余之委靡雖中間亦構奇禍然蹶而復起前年北走燕今年又東游齊魯以爲詩人不登泰山謁孔林

眼界終不寬題目終不大也於是賦詩數百篇滄海日出闕里風規盡收筆底歸以示余余讀一過覺已灰之心怦怦欲動因書此數語于篇首蓋欲使覽者涉流尋源俛仰今昔足以知爾止之可敬而余之可感也夫

龔山續集

魯游草

皖桐方 文爾止著

汪 觀我生

同學 康范生小范 定

陳允衡伯璣

梅 磊杓司

五言古體

初至兗州贈趙五絃司理

卜居石城南草閣臨長陂引水灌園圃可以種菘葵我老閒無事荷鋤手自治方春微雨後綠葉含榮滋忽有故人書云自山東來上言別離後魯國爲士師郡齋頗閒暇雅欲窮聲詩六義誰與研惟爾長相思平昔好遠

游惠我來何遲先寄雙南金以爲道途資感此意真摯
雖遠曷敢辭明旦卽束裝揚鞭向東馳渡江而涉淮又
至大河涯陶丘具雞黍聊以息我疲是時君在濟遣使
來相期僧舍一握手狂喜不自持遂命後車載前路相
追隨臭味旣已合形骸復何疑辟彼蒿與蘿得附松栢
枝左右相纏綿歲寒終不移

來音離在四支
韻俗本遺之

恭謁聖廟

兒時讀魯論卽知慕孔子尼防與龜蒙私心長仰止所
恨南北睽無由一瞻視今年來兗郡本意實爲此郡齋
甫稅駕汲汲問洙水侵晨出東郭周道平如砥驅車曲
阜城乃是古闕里宮牆儼王居數仞曷足擬我從掖門
入直至殿廷裏怵惕拜階下仰首見簠簋杏壇猶有亭

兩觀亦有址古檜乃手植霜根歷千祀因念古帝王宗
廟誰不侈當時炫金碧易代生荆杞萬古巍然存莫與
尼父比賢於堯舜遠斯言非溢美

恭謁聖林

昨日謁孔廟今日謁孔林孔林在何所乃在魯城陰出
城二里餘松栢鬱森森千章夾輦路宋帝曾來臨樓觀
似京闕翁仲何崎嶇其後泗水遠其前洙水深上有古
石橋俯聽潺湲音仰瞻宣聖墓蔚然一高岑伯魚莖其
東子思莖其南子上莖其西喬木皆十尋一廬存墓側
宛見獨居心所植楮已枯三千年至今地下無荆棘樹
上無巢禽子孫世守之兵寇誰敢侵我來拜林下感戀
盈冲襟徘徊不忍去日暮聊謳吟

南音臨古韻
在十二侵內

詠檜

夫子所植檜乃在杏壇前其始為兩樹屹立上參天左者文左紐右者文右旋一丁永嘉亂生意遂索然義寧後再榮左右不復全及至女真初俱化為煨烟元末根重生實開有明先如何弘治間又為野火延道傍有古碑序其榮枯年枯必兆禍亂榮必產聖賢晉唐宋以來歷歷可考焉檜既關世運振古期不愆何時再鬱葱真宰意難宣記云先聖手植檜自周歷漢凡千餘歲至晉懷帝永嘉二年而枯枯三百有九年至隋恭帝義寧元年復榮榮五十一年至唐高宗乾封二年再枯枯三百七十四年至宋仁宗康定元年再榮金宣宗貞祐二年罹于兵火樹遂燬後八十年為元世宗至元三十一年故根重發至明洪武二年枝葉甚茂其高三丈餘圍四尺弘治十二年聖廟焚枝葉又燬惟檜身存耳

詠楷

子貢所植楷乃在孔林側當時哲人萎天地闢無色其徒七十子心喪俱不忒中間端木氏哀思更悽惻築室于墓傍六年面猶墨樹楷沐水橋將以表明德楷不如檜壽那有千年力况彼二千年曾為人所賊百歲根甫生理氣有消息楷已三千年尚存亦奇極莫怪其根枯不枯安可得

曲阜城樓望尼山作

散步上魯城迢遙見尼山相去六十里欲往從之艱依人成遠遊鞍馬仰驛傳雖有山水心那得隨吾便憶昔叔梁父九女而一男其男形跛躄承祀恐不堪顏氏有三女將欲求為偶幼女自請行不嫌其白首既嫁懷隱憂禱于尼山神英靈聚河岳誕生大聖人聖人生不幸

三歲喪厥考顏母抱幽貞守之以終老聖學既成立二十持母喪先殯五父衢後合葬于防防與尼相連皆在魯境內如何不一探坐失此機會茲行太促迫重遊擬今冬不獨登尼防更上龜蒙峰

峭山尋歷下亭故址

昔有李太和李邕分符守此州其書故雄傑其人亦風流子美方弱冠初為河濟遊布衣謁皂蓋意氣欣相投開燕歷下亭賦詩成獻酬濟南名士多此語光千秋今我來歷下吊古無弗搜騎馬出東門逶迤至華不因而上峭山古亭不可求峭湖水亦涵漫衍為平疇山川今昔異何況東諸侯回鞭百感集世事良悠悠峭音鵲峭湖亦名鵲皆作鵲

華不注

歷城東北隅故有華不注晉師逐齊侯三周即此處其山拔地起四面無依附孤峰秀挿天娟娟入雲霧我來恣游覽艱險殊不顧礫石千萬石上下無一樹遠望如芙蓉茵茵未開露所以名華不古人亦善喻今人罕識字相呼失其故趙李乃詞宗如何音亦誤不音芙花附之不同今讀如字非趙子昂詩雲霧潤蒸華不注波濤聲震大明湖李于鱗詩我自能憐華不注推窓君試雪中看則二公亦誤矣况其他乎

泰安道中望岱

向平五嶽遊是予夙所好但恨貧賤身獨力未能到今年客齊魯乃在東海徼岱宗咫尺間安忍不一造仲夏發歷城策蹇泰安道先見徂徠山羣松迎夕照仰首登

封臺危巒插晴昊青天既歷歷白雲何浩浩我甫及山麓已覺開懷抱况當凌絕頂千峰恣遐眺

日觀峰

有客嶽頂宿夜半聞鳴鐘倉皇起披衣言登日觀峰是時五月交薄寒似初冬剛風吹屋瓦僮僕莫敢從我獨奮身往扶危仗孤筇猶喜殘月在崎嶇辨微蹤端坐雙石間待旦且從容東方色漸白稍稍明巖松滄海不可見但見雲霞重日車露一綫烜赫如火龍照人衣洞赤萬壑光溶溶仰天發長嘯豁然開心胸尋常望朝曦那得比岱宗始知秦漢主歷險來登封

登封臺

泰山一何高登封爲之最日月兩觀峰左右手相對秦

觀以爲肩丈人以爲背天門以爲腹石屋以爲胸東望海如杯西望河如帶封中白雲起百里亦靄靄吳閭二千里目力豈能屈孔顏窮練馬後人所附會始皇無字碑蠢然一石塊相去無幾何李斯篆又在或云中有物此石冒其外亦如漢石室金泥藏其內吾欲并發之看取是何態舉世多庸人安能有此輩

石經峪

吾愛唐玄宗隸書泰山銘磨崖數千尺炳煥同日星厥後宋真宗御帳列郊坰其書雖稍遜亦足存典型昨遊水簾洞巨石如翠屏未知誰氏子隸書金剛經其字大於斗勢欲凌滄溟惜乎在谿壑漫漶虧全形又有萬司馬臨流造石亭自書石亭記削壁鏤空青合觀四家書

允足光山靈至于李斯篆十字九凋零其餘瓊瓊輩熠
耀同秋螢

馬上偶然作

少陵年少時省親來濟水任城去泰山不及二百里望
嶽空有詩登嶽竟已矣中歲官華州三峰在州門長夏
苦炎熱未暇探真源清秋涼冷後亦復托空言晚歲出
三峽扁舟下湘潭曾遊道林寺乃在南嶽南咫尺祝融
峰如何竟不探有人譏少陵夙好在巖壑五嶽歷其三
終未登一嶽公誠風雅宗此事太闕畧我因泰山歸馬
上偶然作

兗州古南樓

兗州古南樓今化爲荒臺臺名曰杜甫昔人何謬哉豈
有先賢名呼斥同嬰孩我來臺上遊徬徨復徘徊因謂
守土者何不剪蒿萊重構堂三楹以祀千古才易名曰
工部勒石垂將來此事亦風流羣公互相推總之劫火
後古蹟多成灰任彼天壤名輕視如浮埃

魯酒吟

昔聞魯酒薄此語殊不然我今客東魯夜夜醉始眠借
問是何酒云沽自市廛其地故多黍四境有甘泉居人
善釀之封藏一二年黃者似滄州白者更過焉彼何以
得名此酒遂不傳吾欲表章之賦詩告後賢只是價太
貴一瓢三百錢

聞陳階六給事丘曙戒編修俱外轉悵然有作

淮上多良朋膺仕者有二陳君掌諫垣丘君讀中秘齒

髮雖不同性情則相類予在都門時坦率成深契日日
飲其酒間亦分其惠臨別愈流連贈詩見真意感此不
能忘相勸惟勇退昨日見除目同時補外吏陳猶官憲
使閩海亦善地道里未甚遠糧儲乃重寄丘何爲郡佐
咄咄殊可異瓊州在海外此行良不易君雖少年人體
弱容亦悴况有二親老安忍便遺棄五月出都門六月
抵淮裔恨我羈東究未得一把臂後會知何年臨風發
長喟

聞談長益至徐州久而未歸詩以促之

談叟吾故人氣味最相得酉戌之冬春同遊在京國連
鑣出塞外聚首凡五月夜則對牀眠晝則對案食我性
好苦吟君吟苦更力每日三四篇奇奧不可測是秋我

南歸君尚留薊北自言冬亦返相期會吳越豈知我歸
後君竟不肯發依人往衛州又欲去彰德三年猶未歸
萍蹤太超忽昨歲潤城破人民半戕賊君有八齡兒奔
竄荒江側傍人且憂虞君胡不記憶近聞至徐州理合
歸去亟那有閒心情逍遙事干謁或者先已歸布置又
復出叶我因思君甚寄書相切責年齒五旬外雖貧亦
未極何苦老風塵還家稍休息

書陶石簣先生放生詩後

先生集中有詩十首以
凡百畏刀杖無不受壽

命爲韻字字痛切非他戒殺者比于欲注而刻之
以勸世人而自附二詩于後

偶閱歇菴集有此十首詩沉痛入骨髓真是太導師今
人好善者戒殺亦有詞其言多鄙猥極可訓愚癡聰明
才智人一覽輒棄之惟此詩淵古細玩方得知苟有觸

于中敬信而奉持不戒者亦戒感悟當在茲
古之養親者雞豚以爲貴祭祀與賓客三牲曷可廢市
上有鬻者錢粟皆可易何必自宰割傷我好生意至于
自奉養蔬食原有味必欲下酒物枯魚或乾肺斷無特
殺生以供已啖噬斯言極平恕將以勸同類

憶內

老我歸金陵卜居傍秦淮前爲桃葉渡後爲鈔庫街草
堂雖不寬蕭散稱人懷細君名家子甘與隱者偕麤布
以爲衣苦竹以爲釵課奴種園圃嘉蔬各成排日市錢
百餘可充爨下柴况復植羣樹花葉盈空堦無事綠牕
下相對如朋儕奈何舍茲去遠涉天一涯徐究逾千里
屢月音信乖雖有賢主人懷抱終不佳明年誓勿出嚜

粥棲茅齋

憂旱

今年寒食後九十日不雨江南水亦涸何況爾東土農
人仰麥秋收未及四五猶覲五月內一雨種禾黍豈知
節候過小暑復大暑縱使甘澤垂恐遲亦無補民生不
自保安望輸官府眼見秋冬間山東羣盜舉八月吾早
歸研田收少許且向清溪傍努力事園圃

苦蠅

南方夏苦蚊北方夏苦蠅避蚊猶有帳避蠅竟無憑晨
光甫熹微百萬來飛騰衣冠與書籍遺穢臭不勝最是
飲食時堆案尤可憎撲之不易撲仍之實難仍何方避
蠅患惟有一法能向南覓土室牕牖紗層層先期驅除

盡俾無隙可乘閉戶設枕簟庶可安寢興第愁風不入
日中更炎蒸披衣聊啟戶又復來侵凌古有機拂子物
小而用弘左右不停手揮霍良足稱始悟杜老詩義在
誰肯徵杜詩咏機拂子有此句

汶上贈呂孝芝明府故司馬忠節公像石先生之子也

先公大司馬夙昔官南都予以猶子義兼奉爲師模辱
公盼睐恩名予曰鳳雛感此意真摯時時至坐隅公歸
五載後仗節遂捐軀忠貞昭日月萬古永不渝諸昆紹
丕業接踵翔天衢君爲中都宰膏澤何敷腴吟鞭偶過
此下馬立斯須握手道新懽懷舊仍悲吁

濟寧贈陳斗山州守

斗山朔方士溫粹如南人三年守濟州恩澤遍斯民斯

民感其義嬉樂無冬春我昨來南池僧扉寄吟身與子
邂逅間披豁見天真七月我南歸君送河之漘九月我
重來內詔催朱輪尋當送君去六翮翔秋旻

荅楊聖喻處士

浮榮世所慕嘉遯古亦稀况在河濟間此意今已微楊
生本華胄棗萼爭光輝獨不喜干祿臥疾棲林扉素心
嗜風雅采筆時一揮思如夏泉湧氣若秋雲飛昔我寓
蕪江相訪至漁磯烟簑偶相失悵望心依依今我來任
城東園接芳椒願言結縞紵所恨匆匆歸四詩先見投
欲別還牽衣佳期訂九月觴詠無乖違

書張孝烈先生傳後先生字玉楚潛山人

我友陳襄雲抱道隱潛嶽往歲時相過詩篇共酬酢爲

言其鄉人死難者鑿鑿中間孝且烈莫張玉楚若厥父
病在牀羣盜肆殺掠寧其蹈白刃弗忍去帷幕幼子十
六齡奮身前往奪傷哉三世人頃刻同溝壑我聞襄雲
語老淚應聲落因欲爲之傳軫石先有作王于一別序
事倣歐陽生氣宛如昨傳後書此詩以寄通州博先生

青熊現爲
通州廣文

東阿贈吳雨蒼明府

客從任城來篤言之洛河仲冬河已冰取道經東阿東
阿古巖邑今亦荒殘多美人妙爲政樂易蠲煩苛其民
爭戴之四野皆謳歌我馬憇城外訪君入城裏尋常頗
厭客聞我到轉喜一揖未及終汲汲呼酒餌夜深且下
榻不令還旅邸感此意良厚况復潤行李明旦我當發

君尚欲強留歲暮風雪寒焉能久夷猶開春江水綠君
又之涪州巴蜀數千里音書杳難求後會知何年握手
悵悠悠

永年贈余中台明府

昔別是何處西子湖之東秋飈吹落木秋渚鳴征鴻旅
舍一握手形勢各忽忽別來十五年書札無繇通聞君
官趙郡譽望日以崇外吏寧久淹立見乘花驄我適遊
濟上咫尺欽仁風安忍貧賤交棄置如飛蓬揚鞭一相
訪索酒話深衷不久言旋歸繾綣意無窮

君與吾兄子早歲爲婚姻兄子先朝露遺孤罹百屯賴
有新婦賢縞衣佐清貧實維名家女壺範得其真前年
君伯氏枉駕桐水濱朝夕過我廬觴詠歷冬春寄聲訊

茂宰離索難具陳今我自南來道途多艱辛既以車笠
義又爲骨肉親不比廣川上悠悠行路人

贈申鳧盟處士

往歲客都門館於魏栢鄉栢鄉時與言申子才莫當出
其贈答詩展誦聲琅琅風格似老杜田父泥飲章我心
實企慕懷抱無繇將今年客山東策蹇來滏陽侵晨入
君里未午升君堂一見如舊懽把酒傾肝腸明日在我
寓手携詩一囊古體擬漢魏近體宗初唐其詞雖弘博
其意甚悲涼君家節愍公竭忠事 先皇所痛甲申變
致命同沅湘君能守其訓不復蹈名場自稱老布衣戢
影南山岡此義尤可欽豈止詩人行我亦抱微尚攻詩
三十霜詩信能窮人旅食羈殊方風雪難久留屈指歸
建康及此未歸日數數來相望

七言古體

白下留別梅杓司

梅生抱病長干寺兩耳雖聾有奇致不憂妻子餓經旬
只想詩篇傳後世昨歸典却響山田百金盡作梨棗錢
刻成詩集十餘卷含風咀雅追前賢少年詞采本華潤
中年氣格更超峻茲編已足傳千秋况乃餘年再精進
方春送我去河東貽詩數本行笥中故人施趙應相見
擊節高歌賞鑒同

施尚白趙五絃
皆杓司舊友也

北道行

長淮以北往來熟日未崦嵫投店宿主人請客進上房
其馬卽繫東西屋白麵調水烙爲餅黃黍雜豆炊爲粥
北方最少是粳米南人祇得隨風俗縱橫土炕任客眠

間有溫湯濯我足今宵燈下算還錢明日雞鳴啟行促

濟寧道中短歌

有客從南來獨行無與偕初日渡大江四日渡長淮十日渡黃河十五日至濟水涯世間險阻稱四瀆我今半月走遍意未足明朝更上泰山頂東海西邊觀日出

春歸歎

三月晦日送春歸楊花點點沾人衣春正歸時人轉出此身也似楊花飛前年三月北平路去年三月彭城寓只道今年春在家那知又入兗州署春光荏苒道途艱底事年年不得閒人生少壯已可惜况我將衰鬢髮頽

趵突泉歌

山東諸郡濟南大音齊州自古稱都會中有名泉七十

二尤以趵突泉為最趵突發源王屋山伏流千里來河間歷城西南始湧出平地三穴如輪輻雪濤噴薄高數尺又如瀑布衝激石散為灤水入清河委輸東海無朝夕泉上嵯峨樓復亭香龕繡幙供仙靈道人煮茗待游客自向波心汲一餅

大明湖歌

濟南城中大明湖乃在貢院西北隅其南即為藩司署墻脚不許通樵蘇七十二泉滙于此嚴冬大旱水不枯湖中菱荷雜葭莢夏月望之如蓬壺往時官府好事者小舸載酒邀且娛民間采蓮亦不禁所以此地稱名區崇禎戊寅十二月遼海萬騎來燕都前鋒直抵濟南郡濟南防備甚疎虞是時山東大方伯張公鍾陽吾姊夫

公諱秉文字字舍之桐城人率彼羣吏嬰城守辛苦半月
萬曆庚戌進士別號鍾陽猶枝梧已卯元旦城竟破公中一矢身先殂吾姊聞難
且不哭立召二妾來咨謨爺爲大臣我命婦一死以外
無他圖嗟汝二姬各有子長兒雖歸幼兒俱於義猶可
以緩死抱兒且往民家逋小婦抗言吾弗活願與母氏
同捐軀兩人縫紉其衣帶欣然奮身投此湖中婦年已
過四十本欲殉難還踟躕腹中正懷五月孕膝下又有
雙鳳雛私念吾家大小悉赴水安忍此輩爲鰥鮒泣拜
忠謹二老婢一婢一孩負之趨倘遇白刃斯已矣僥倖
不殺還至此處來尋吾大明湖邊有深澗上用柴草雜
亂鋪蒙首潛身匿其下六日不食氣息無兵來見是濟
泲水水面浮屍如衆鳧匆匆亦不暇搜索此婦性命遂

免屠六日以後番兵去鄉民次第來闖闔城中殺戮十
餘萬家家骨肉哀號呼中婦聞聲匍匐出自言我是張
老姑張公平日多惠政百姓聞者爭前驅因導此婦尋
公尸尸在城樓色不渝又倩一人入湖水撈尋大婦小
婦於寒蘆俄頃二尸得昇出遂與張公之尸並陳於路
衢殘黎助錢買薄板草草殯殮何所需異哉二婢亦未
殺被擄爲兵剉馬芻各言此子是已子仍以殘餅爲之
舖兵去婢留尋阿母同日抱還其兩孤一孤乃是已所
出一孤乃是小婦所遺珠未幾復產遺腹子與前二子
同煦濡扶棺挈兒返故里親戚見者咸嗟吁此雖張公
盛德之所致亦由此婦才智與人殊聖朝褒忠務覈實
公膺贈典良非誣二十年後我遊濟大明湖邊立斯須

追惟往事不勝痛臨風雪涕霑平蕪忠臣烈婦分自盡
豈必求人知之乎第恐年久事湮沒因作此詩告吾徒

濟水歌

濟南故以濟水名濟水今由地中行所謂大小清河非
濟水乃是汶灤二水相合併汶水發源泰安州行五百
里始入漕河流灤水發源趵突泉行十八里卽與汶水
連二水合爲大清河夏秋水漲多風波我來清河之傍
旅店宿偶遇老生張無頗爲予分疏甚明悉酒酣遂作
濟水歌獨怪濟水旣伏不可見仍與五嶽四瀆並稱謂
之何

嶽廟歌

昨者予上泰山頂聖母之祠甚華整青帝宮爲野火焚

東嶽廟中香燭冷因念五嶽東嶽尊帝王封禪典禮存
蚩蚩凡民縱不識紛紛儒者何無言今朝下山入州治
始知另有嶽廟供祭祀巍巍宮殿似皇居不比仙壇與
佛寺七十二君封禪時乘輿警蹕咸在茲中有古栢漢
武植盤根錯節冰霜姿復有古槐在栢後唐玄手植昔
猶茂如今年久生氣奄從來槐不如栢壽其餘巨木數
十株陰森疑有鬼神扶聞道此州屢殘破此廟安穩獨
無虞自非天子諸侯不得祭小民焉得而矯誣却笑民
間但知有聖母歲輸金錢百萬何其愚

岱宗密雪圖歌

有序

洪武初年王蒙叔明知泰安州州後有樓正面
泰山叔明張絹于壁作岱宗圖三年而後成其
友陳汝經惟允自濟南來訪之方看畫而雪大
作因欲改爲雪景沉思良久難于着色惟允曰

不難可製小弓縛二粉筆于上張蒲彈之宛如
雪態叔明叫絕以為神奇即題岱宗密雪圖以
贈惟允流傳至今尚在予雖未見其畫而聞其
事今飲泰安署中忽憶此事故作歌

黃鶴山樵松雪甥甥學舅畫畫易成其人其詩更超出
所以元季大得名國初曾為泰安守有樓即在廳事後
朝朝暮暮對諸峰欲貌諸峰不敢苟橫張絹素當牕屏
偶然興到時一揮揣摩三年圖始畢山靈頓覺增光輝
陳生適為濟南幕歲終相訪來東嶽正登此樓觀此畫
滿天無數梨花落陳生看畫連道工回首看山在雪中
若使此圖是雪景方與眼前泰安岱同王云幸而未設色
改作雪景改亦得只是精神在墨氣着粉未免掩我墨
陳云着粉亦不難矯竹為弓向上彈宛似半空飛舞態
兩人大笑真奇觀急呼香醪與客飲夜深醉即樓頭寢

明朝叔明紀其事并揭此圖贈惟允惟允他日携歸吳
倪迂黃癡皆嗟吁山樵平生多墨妙此圖妙絕天下無
我雖未見聞此事今日偶來泰安治酒間含笑語州守
如此主賓良不易

題徐文長先生水墨真蹟并正五絃司理

天池山人有四絕筆底寒空動烟雪詩詞舉世解流傳
書畫無多恐磨滅趙子衙齋東郡東高懸一軸中堂中
書法古健類章草超然不與時賢同我初入門見此軸
瞻顧久之看未足君言吾家不止此尚有天池畫數幅
我聞驚喜乞借觀頃刻蕭蕭風雨寒秃毫淡墨偏有態
奇山怪樹形不完最妙花間一處子撫石彈琴露纖指
却疑點綴似塗鴉轉覺姿容媚無比其餘梅菊暨松筠

但取其意不取真譬如吸露餐霞者豈是人間食肉人
我謂趙子此墨寶吳綾蜀錦收藏好每日公餘退食時
展開如入山陰道

六月初三夜夢與蕭尺木談詩竟日且以其居典
予庭中秋花爛熳覺而異之因記以詩

四年不見赭山翁昨夜宛然來夢中手持一詩七言體
命予校閱何其工更推居室與予住庭際秋蘭花幾叢
思君半百方有後老夫暮景將無同

夜坐納涼有感

中庭古槐大十圍中夜好月流光輝槐陰貪坐不肯睡
靜念往事多乖違在家日久思作客在客日久又思歸
正如猢猻見此樹一上一下無停機半生蹤跡類如此

袁公善喻何其微

袁石公云我輩性情大槩似猴在樹
下覺樹上好及上樹又覺樹下好一

上一下終
無定識也

李溉林副憲書來却寄

七月我歸自濟水塵途落落少知己何人爲寄尺書來
云是彭城使君李使君昔宰司空山好與山人共往還
六年厚貺不知倦千古高風莫可攀昨歲分司淮泗路
雲龍山前與我遇又爲謀構草堂資因買一廛桃葉渡
草堂遂以懷溉名沒齒難忘使君情獨惜江南河北遠
那得聚首如平生今年潦倒客東郡徐兗二州相接近
偶逢驛吏通寸音使君遽爾垂芳訊開械字字是離棕
讀罷沉吟意萬重尤喜星軺來歷下預期嘉會在今冬

題張大風山人松石圖

泰山上有百尺松可惜曾受秦時封蔣山下有一片石
亦受陳時封可惜世間土木本無情且以微寵累其名
士人守身若處子豈肯輕受微塵滓張翁贈我松石圖
筆意瀟灑形高孤自言此是唐宋物不是陳卿秦大夫

夢劍行

秋夜夢

一大人遺予劍器上有細字

不知所謂醒而作歌

神人寶劍光陸離夢中錫我何所爲我本山中採樵者
乍捧此劍心先疑一自狼星射天府中原處處聞鞞鼓
書生有志勒燕然大將誰能斬溫禹

濟寧署中喜遇潘蜀藻

潘生才大今詩伯豈肯容容守田宅所以去年客彭城
今年又作任城客霜鴻刷羽凌高秋不爲區區稻粱謀

平生雅尚在山水闕里岱宗尋勝遊獨憐官舍關防好
那能率意恣幽討吟鞭直待杏花時南歸方刻徐充草

廣平謁申節愍公祠

甲申之變古所無千載而下猶嗟吁何爲當時立朝者
強半濡忍全其軀庸人偷生莫肯死死者二十四君子
吳橋范與永年申各姓煌煌著青史有客來遊洛滄河
道經節愍祠下過繫馬入祠一展謁蒼松翠栢英靈多
聞公三子皆人傑長子涵光更風烈布衣不染京洛塵
詩篇盡作峨眉雪我亦江東老逸民與爾傾蓋情自親
况予婦翁汪文烈亦與節愍同致身今人仕宦愛便益
反云死難爲矯激試令禮拜諸公祠亦知感歎聲嘖嘖

蔡中郎八分書歌

廣平有淳于長夏承碑乃蔡邕隸書其來已久
嘉靖間石工取以修城遂失所在今重刻于石
漢隸石經碑第一孔廟禮器碑第二苦縣老子碑第三
隴西曹全碑第四四碑俱是蔡邕書書後却不住名字
我昔聞諸長老言訪求其本不易致前年北平宋使君
惠我曹全志墓文我乍獲此如重寶筆法高簡更出羣
因而臨摹百餘日僅能髣髴其半分觀者但見漢隸少
遂謂此足張吾軍今年冬月游洛水聞有漢隸在城裏
欣然往觀碑果在其傍小字序原委中郎初本不可得
此是後人重摹擬八分瘦硬方通神此書稍肥未盡美
雖未盡美典型存觀者溯流而窮源李蔡實爲篆隸祖
片石隻字皆瑤琨寄語邦君覆以屋勿令風雨生苔痕
至于修城石千萬曷忍取此埋城根

五言今體

將之兗州畱別內子

舊京新卜築借隱正悠悠家食無長策囊書復遠遊
出門方上巳歸舍必中秋不是輕離別依人可自繇
穠日渡江宿烏衣鎮

江介雨初晴揚帆過浦城晝長便平客路馬壯促人行
白水遶芳甸烏衣垂令名當年王謝子或有此中耕

滁州

馮公官太僕

鄴仙先生

風雅扇江淮往歲曾相訪佳遊輒與

偕探梅尋古澗品菊醉高齋此事俱陳跡誰能不感懷

清流關

南譙城以北極目見羣山擁塞疑無路崎嶇上有關古

人爭要害今日任躋攀躍馬橫戈者紛紛往復還

臨淮

長淮將次近仰首望中都城闕規模在陵園氣色無萬
松誰剪伐寸草未昭蘇野店逢遺老相看淚眼俱

濠梁

莊惠居非遠觀魚亦偶然其人良足重此地故應傳破
驛臨春水潛鱗動夕烟道傍車馬客誰解慕前賢

塗山

塗山吾自命却未到塗山驅馬始今日與龍在此間乾
坤方正位日月又循環俯首淚承睫因之懷袖斑

宿州

鍾離纔昨日今又至符離野曠山應少途長客易饑郵

亭秣馬候鄰舍飯牛時寧戚今何在伊人良可思州有寧家

永城

一入中州界年荒饑者多近郊雖賑恤在野復催科客
憇惟增歎驢疲不受駝前村逢店歇莫問飯如何宿州北

飯無米

太丘祠

永城官道側猶有太丘祠漢陳實為太丘長卽今永城是下馬一長揖

高風宛在茲壞垣鄰亂塚枯蘚沒殘碑今世循良少春

醪薦者誰

鄧陽

功如蕭相國食邑僅鄧左何侯村落居然在封疆是也
不小人猶保聚巨室每誅求嘆息丁司馬家無髻鬣畱

前司馬丁啟睿家于鄧以叛誅其宅沒官

曹縣

知是古曹國逢人問漆園莊生曾作吏遺跡豈無存漆園

凡數處以曹州為正蓋州有南華山也兵馬盈官路風沙掩店門負羈妻

已朽誰與進壺餐

定陶

地僻無山水民貧少積儲不知范少伯何取此中居朱公

三致千金即此處兵火失堯廟堯始封于陶故有廟今不知所在村烟剩戚墟

戚夫人定陶人尚有村故人投我轄弔古且徐徐時馬倩若為陶令

鉅野

岐山鳳不至鉅野麟何來西狩獲麟即在此所以魯中叟逢之

掩袂哀生初曾繫紱經後尚餘臺客過偏多感兼悲王

粲才王仲宣鉅野人

嘉祥

嘉祥舊武城既以子游名况復三賢里曾替父子游臺滅明俱生於此

當為千古榮驛亭有高阜題句見深情亭中有范質公呂豫石兩先生

詩年號何人剗傷哉歲月更詩後崇禎某年俱為人剗去

濟寧

四明有狂客相遇謫仙人傾倒酒樓上徘徊濟水濱賀

觴太白于酒樓即在此齊梁非復舊李杜尚如新李杜皆自久于齊梁間再誦

南池句停驂豁我神杜詩與任城許士薄遊南池亦在此

兗州

出門十五日今始到嶽陽東郡幾經破南樓先已亡趨

庭懷杜老工部父間為任城令公省親至此有登南樓詩廢址惜靈光且就賢

司李槐陰一舉觴兗州李署有槐甚大

寧陽日今故城

瑕丘方稅駕又復歷山行不惜馳驅苦因多遊覽情大

風知歲旱微雨覺塵輕晚渡寧陽水堪嗟魚尾頰

禹廟寧陽縣北

禹廟鬱嵯峨中庭古柏多當年淪濟潔此地想經過崇

碣迥相對高文永不磨廟中有商公銘乍看殊簡畧無

奈僕夫何

肥城

肥子城南路迢迢百里餘昨猶聞寇盜今始見村墟田

婦頂多瘦山民耕用驢此方風俗古疑有范公居肥有陶山

自范蠡入海處或云陶朱公乃肥之陶山非定陶也

長清

羣邑凋殘甚斯城稍可觀人家烟火密使客驛亭寬塔

影牕中見松陰枕上看靈巖何處寺欲往路艱難靈巖寺在

長清方山佛圖澄所居林壑絕勝

濟南

山海一都會富強無踰茲可憐兵燹後非復太平時

笑泉仍列華不平注故奇看山與飲水且勿定歸期

歷城

繫馬歷城東題詩野店中峭華當盛世峭華二山名在濟南東北邊

李振雄風邊廷實詞賦大名在鄉園舊業空兩家尋後

裔蕭颯等秋蓬

曲阜

金山寶集

魯游草

三之四

昔人游詠處每過必沈吟况是聖賢里能無恭敬心魯城仍故國洙水盡高林檜與楷平聲兼壽二千年至今

汶上

三家分魯日此地號中都先聖曾為宰遺風永不渝羣黎凋亂後一水剩城隅幸有循良者窮簷稍稍蘇是時呂孝芝為邑令有仁聲汶人尸祝之

東平

齊魯邊隅地荒殘不記年獨餘梁太素坊表尚巍然東平民舍多毀而科第是何物老翁殊可憐一身經五代猶狀元坊仍在戀舊青氈

東阿

一水界城中長橋兩岸通斯民安樂土茂宰布仁風時

雨蒼為阿令襍被眠官舍張燈飲寓公三歸臺在否懷古意無窮營仲三歸臺在阿

東昌

策蹇東昌道聊城仍舊名迤西為趙郡直北是燕京車馬紛如織舟船凍不行射書何處所空憶魯連生

堂邑

清曉過聊攝黃昏到發干戰場今已沒戎馬未經殘邑有孫麗古戰場巨室有張老尚書是漢官沾沾誇爵里無乃太顛預張公鳳翔樹大碑于郭外自序其兩朝官爵故云

館陶

館陶猶漢邑南北兩城分田舍各相保兵戈如不聞家家種梨棗歲歲樂耕耘奔走道傍者輸他樵牧羣

曲周

先朝陳少傅曾令我桐川恩澤亦何遠謳歌今尚傳游
人來德里下馬問名賢故老猶能說風流未百年

曲周人初為桐令
桐人祠之故云

廣平

兩歲客徐兗今冬又冀州遠行雖不厭老至亦含愁大
雪投荒寺微暄暴啟裘主人情意篤旬日且淹留

余中
台也

大名

汨汨歲將暮言歸自廣平長途經魏郡沃野羨元城風
雪催征騎雲山動旅情當年吾伯叔父老尚知名

予世
父魯

岳先生起家大名司理從
父赤城先生起家元城令

七言今體

早春寄懷馬倩若定陶

二十年前老病重微為令太嗟此時危不敢言
官小猶能免禍羅舊友全凋餘白髮新春欲往奈黃河
遙知甘雨露農畝亦有微膏及澗阿

清明日家祭因懷先隴

久矣無心戀故鄉獨於丘壠不能忘鳳橋松栢十章茂
先司徒蛟渚蓮華一帶香先孺人雖有諸昆輪拜掃那
堪三歲闕椒漿客中伏臘空回首但薦溪毛欲斷腸

將之兗州畱別草堂

昨歲移居淮水西門前蔬菜兩三畦灌園且學於陵子
饑畝無慙冀缺妻柳眼逢春青未了蔣牙經雨綠初齊

如何舍此山東去僕僕黃塵踐馬蹄

劉家口渡河歸德府屬

少小從來輕遠遊如今千里亦含愁先經夏邑纔陶

更過曹州是兗州馬首渡河爭北向客心隨水只東流

殘春未免思鄉切預卜歸期在早秋

定陶署中與馬倩若夜話

二月江東寄爾書濁河風浪正愁予豈知花落仍過此

只是萍蹤無定居久客自諳遊道苦高人亦覺宦情疎

年來仕隱皆羈絆那得逍遙賦遂初

三月十九日鉅野道中

啼鵓又過一年春每到今朝倍愴神南詔也歸新負版

西山誰問舊遺民龔開未免為寒乞唐珣亡何作館賓

鞭策小驂來鉅野始知尼父泣麒麟

魯故宮

碧瓦朱甍東郡東郡人猶說魯王宮當年睥睨山河壯

此日呆愚戶牖空不毀靈光疑有數兗州屢破民舍俱焚獨西宮無恙

欲師延壽恨無窮王延壽作魯靈光賦珊瑚寶玦今何在瀛海蒼

茫夕照中

司理署有三鹿五鶴時時至予坐隅似欲相親者

因贈以詩

鶴棲海澨鹿山阿闌入官齋可奈何拂性自應憐羽角

依人聊以免虞羅似知詞客渾無忌每到吟時定一過

昨夜月明槐樹下幾行清影共婆娑

寄懷萊州守鄧叔奇

魯山讀集

魯游草

于湖小別十經秋苦雨酸風憶昔遊老我一竿歸下澤
聞君千騎領諸侯李邕不惜新亭燕楊震難為故友謀
李楊俱為齊郡守方物從來誇爾葛且分尋尺寄瑕丘

戲題釣突泉壁

歷下城南釣突泉散為灤水入長川雪濤翻處真奇絕
玉盃盛來自灑然海內遊觀知不少壁間鏤刻倩誰傳
吳興老子詩尤劣底事人人有和篇趙子昂詩平地湧出白玉壺鄙俚不

成語

七忠祠讀施尚白使君碑記

祠在濟南西門內廢已久提學施公重建

視昔有加

宛陵才子任山東較士能興齊魯風方浚泉源標勝槩
施公至始浚之更新祠廟闡遺忠詩宗梅沈吟何壯

宣城梅禹全沈君典皆以詩名世尚自似之

文擬歐曾製亦工最是碑碣無

歲月異時人只道天崇

登岱十首

年少長懷五岳遊獨憐身賤老滄洲濟陽千里依人至
社首兼程得自繇初夏不妨炎景逼閒心先共白雲浮
攀蘿捫葛吾猶喜况有肩輿上上頭

不為元君謁岱宗山人意在日觀峰黃昏且就齋房宿
子夜誰撞岳廟鐘更上巉巖迎旭采欲窺滄海浣塵容
虛空彷彿聞天語足踏高雲第幾重

峰頭片石領朝曦道是秦皇無字碑中別有藏人莫識
重來作頌意何為李斯有頌二世功德文金泥玉簡封函固漢武帝
鐵畫銀鈎制作奇唐玄宗七十二君皆駐輦寥寥陳跡到

今疑

吳觀峰與越觀連極目淮徐一點烟豈有孔顏窮練馬

但聞孫石隱林泉

孫明復石守道

名儒寂寞空遺跡聖母荒唐

失紀年可笑愚民好祈福委輸金幣不論錢

石屋高寒絕四鄰相傳玉女此修真却疑上古飛昇去

豈愛如今祀禱頻監稅有官防羽士施財惟媪倍他人

洗頭盆在華山頂未審東西是一神

朝雲飛出暮飛還古洞藏雲宵靄間觸石便爲天下雨

流膏豈獨海邊山往時祝史誠能格今歲祈求澤尚慳

二麥焦枯麻豆死東皇爭不念民艱

爭上聲

南天門外石嵯峨俯瞰諸山培塿多梁父織微何足禪

徂徠蒼秀尚堪摩盪胸真有雲千疊決背全無鳥一過

可惜少陵平地望若登絕頂更如何

屢日攀躋興未闌輿僮促駕阻人歡磨崖想榻千餘字

下磴休愁十八盤空有九州來展謁曾無一客解游觀

雞鳴上頂須臾返滿眼雲峰總不看

山遊未許避峻嶒索隱探奇我獨能上界似無峰不歷

下方猶有興堪乘村氓遇險偏生怯俗吏逢幽亦懶登

借問往來冠蓋者水簾石峪見何曾

輦道全憑嬴帝開五松疑是後人栽片雲輕灑微微雨

萬壑長聞隱隱雷攬勝自宜隨路歇思歸無奈僕夫催

殷勤寄語山靈道今歲秋冬還復來

午日寄懷從兄繡山

去年長夏借兄園酒釐詩瓢樂事繁簫鼓畫船桃葉渡

池塘芳草杏花村無端驅策來青嶽幾度思歸夢白門
羣從分携賓客少佳辰誰與泛蒲根

歸思

草堂三樹石榴花五月開時爛似霞夜夜殘紅滿堦砌
朝朝新綠上牕紗細君曾釀葡萄酒小婢能煎茉莉茶
况有胡牀鋪楚簟主人何事不歸家

休夏

年年暑月觸炎威奔走風塵生事微今歲遠遊依郡閣
且如結制閉僧扉葷腥暫戒惟蔬食巾襪都除剩葛衣
高枕北牕良足樂只愁江左信音稀

六月十五日夜見月有懷

去年今日客蘇州記與良朋醉虎丘姚仙期黃甫及余澹心萬木

叢中無暑氣千人石上有名謳歸時皓月隨蓮舫臥處
涼風滿竹樓隔歲相思不相見吳江烟水夢悠悠

聞從子蛟峰補濟寧兵憲寄此

旅食京華方十暑栖遲郎署亦三霜杜詩十暑岷山無葛三霜楚戶砧無
炊每日從鄰借有酒隨時喚客嘗薄祿那能供嘯咏外
臺聊以寄徜徉却愁汶水通南北迎送紛紜又不遑

喜撲面到

自別金陵五月餘鱗鴻不見一行書長淮奔走惟憑汝
盡室平安且慰予池上綠波添幾尺門前白板賃誰居
爲言新徙園丁好豆架瓜棚滿敞廬

七夕宿趙無損進士村居兼晤姚山人冬只

郡齋相見卽相親邀我來遊汶水濱正擬中都尋茂宰

命山續集
合從南郭訪高人風騷况有黃山客田舍全無紫陌塵
且與開尊秋樹下今宵牛女亦逡巡

嘉祥贈張護木明府

春去秋來過武城城中瓦礫未全平當年學道知何處
此日絃歌尚有聲冷署懸魚欽苦節荒郊繫馬愧深情
委蛇退食猶難飽那得壺觴餉友生

雨中過淮不及上岸有懷范眉生丘季貞闢百詩

諸子

漂母祠前數往來故人相見必徘徊無如河北歸心急
又值城西暮雨催傾仄泥塗難得上倉皇懷抱那能開
菊花時節重過此定就晴軒一舉杯

重至兗州贈季顯公

客路相逢正夕陽到來同寓復同牀論詩夜坐孤燈下
攜手朝行泗水傍杜老城樓猶有慨魯王宮殿更堪傷
君家淮右多娛樂何苦披裘犯雪霜

送趙五絃之任南安

期君定着惠文冠此日南遷非所懽但念趨朝多履險
不如佐郡且偷安三江舟楫隨潮上一路雲山撫枕看
想到署齋無長物蠻花千本繞朱闌

廣平贈許復菴太守

許先守曹州

東郡曾聞刺史賢南華山下頌聲偏祗今驅策來洛水
又見流膏被滏川授簡况容詞賦客開尊不畏雪霜天
獨憐歲暮歸心劇那得頻頻侍綺筵

至日飲申臬盟齋頭同令弟觀仲隨叔

薄遊魯郡亦云遠底事侵尋趙郡來總為懷人在洛水
兼之弔古上叢臺歸途只恐歲華盡旅舍俄驚春氣回
不是君家兄弟好佳辰誰與泛罇壘

婺源汪策以出其尊人青岩傳索予題之

滏陽河上遇汪生霜夜持杯對短檠為語先人曾守義
至今江國尚傳聲腐儒殉難知無益忠憤填胸自不平

我友二吳同一死聞君說罷淚霑纓二吳日生次尾也

寄懷麻城劉石帆

都門風雪歲將殘旅館蕭條客被單幸有故人來抵足

從茲長夜不愁寒戊戌冬與石帆同寓三年魚腹疎音問萬里鴻

達刷羽翰石帆新舉于鄉吾欲扁舟游赤壁可能車馬會江干

明年予將楚游

五言絕句

三月晦日

客裏春歸去誰能不憶家可憐桃葉渡無數牡丹花

晝寢

長夏觀書倦隨時就枕酣身猶羈岱北夢已遍江南

夜坐

夜久竟忘寐一燈昏復明那知鄰舍子愁殺讀書聲

泰山道中賦得尼父昔於此三首

尼父昔於此心傷寡婦哀寧為猛虎食不向城中來

尼父昔於此違山訝蟪蛄何必泰山下此聲無處無

尼父昔於此道逢榮啟期自言有三樂世人知者誰

太白酒樓

蜀客酒一杯高樓名千古多少後來人紛紛委黃土
陵谷有時壞此樓長若新須知賀與李只是兩詩人
南池

自古有南池如何唐始著秋雨冷菰蒲是憶青氈處
當年許主簿附驥亦不朽底事宦游人不飲詩人酒

遇鄉人

君從石城來曾過青溪否我家傍青溪門前數株柳

得家書

旅舍正愁人忽報家書至未省書中言先看平安字

黃河

朝發嶧山湖暮宿黃河岸舉首望黃河一望一腸斷

七言絕句

上巳渡江

倦遊纔返石城阿又被飢驅奈若何路北淮南山更遠
愁如江北草偏多

臨淮道中

長淮西望鎮鄒山 仁祖皇陵咫尺間欲去城南一稽
首只愁痛絕未能還

旅店贈歌者

胡姬十五弄琵琶名喚青萍亦可嗟誰解公孫大孃舞
前身只恐是楊花

兗州

一郡人家兵火殘魯王宮殿獨平安遺民莫上城頭望

芳草萋萋不忍看

五日有懷

朱雀橋邊駐轉蓬
茅茨判作灌園翁
那知今日菖蒲酒
又在齊州官舍中

五月十五夜夢孫豹人

孫秦人
寓廣陵

旅魂終夜繞天涯
又過三原處士家
似說揚州明月好
蕃釐觀裏看瓊花

夜坐

酒少愁多夢不成
起來閒步候雞鳴
滿天星露涼如水
衆鳥無聲鶴一聲

焚香

晝長夜短睡不足
童子晨興熟黃熟
醒來如對香爐峰

一縷晴雲散空谷

試茶

幽叢嫩蕊產巖阿
亦有旗鎗形若何
應憤昔人奴事際
結成兵象不爲過

一作多

糊牕

南牕北牕紙層層
莫使飛蟲一隙乘
借問炎天何苦密
不愁煩暑只愁蠅

立秋

郡齋木葉報秋聲
客被單寒夢不成
睡起秋聲無處覓
刺桐花下月微明

苦吟

吟聲切切似秋蟲
每到秋來吟更工
最是夜深人靜後

金口雜錄
滿堦槐影月明中

贈卜者

河向先生口底懸閉門端坐有餘錢羅冲不及君平樂
賈誼方知季主賢

七月十五日悼亡

今宵見月忽凄然茅舍同居憶往年菱藕塘邊楊樹下
胡牀露坐不成眠

八月初七日抵舍

三月辭家八月歸柴門楊柳尚依依秋來不比春來路
渡口潮痕沒釣磯

